

清 史 列 傳

冊 署



清史列傳 卷四十五

大臣畫一傳檔後編一

僧格林沁

僧格林沁博爾濟吉特氏蒙古科爾沁旗人本生父畢啟四等台吉以僧格林沁功追封貝勒初科爾沁多羅貝勒新吉倫於順治七年晉封扎薩克多羅郡王世襲罔替承襲八次至索特納木多布齊卒無子道光五年七月得旨伊族姪僧格林沁作爲索特納木多布齊之子承襲科爾沁扎薩克多羅郡王爵十月襲封命在御前行走十二月賞戴三眼花翎六年賞用紫纏九年賞穿黃馬褂十四年授御前大臣尋補正白旗領侍衛內大臣正藍旗蒙古都統十五年命總理行營十六年授鑲白旗滿洲都統十七年賞用黃纏二十一年幹珠爾巴諾們罕私開牧場例得處分理藩院覈議未能詳細僧格林沁上疏劾之上嚴飭更定二十四年充右翼監督三十年九月密雲屬穆家峪匪徒持械逞兇僧格林沁奏請查辦允奏尋授左翼監督十二月賞給四團正龍補服准予穿用咸豐二年宣宗成皇帝

梓宮奉安慕陵僧格林沁恪恭將事賞加三級三年五月粵西逆匪分擾河南上以京師根本重地防範稽察均關緊要命僧格林沁偕左都御史花沙納等專辦京城各旗營防守事宜僧格林沁疏陳稽察章程十二條下所司議行八月賊由直隸永年之臨洺關竄正定府上授惠親王綿愉爲奉命大將軍僧格林沁爲參贊大臣御乾清宮親頒關防並頒給訥庫尼素光刀九月赴防紫荆關十月賊由滄州竄踞靜海等處圖竄天津僧格林沁進軍永清屬之王慶坨防賊北犯得旨僧格林沁籌備防剿一切布置均合機宜天氣嚴寒該大臣辛苦備嘗且拊循士卒尤能甘苦與共殊堪嘉尙著發去御用貂冠一頂黑狐駱馬褂一件綠玉煙壺一個白玉四喜搬指一個四年正月移師王家口適賊由靜海竄至以有備遂折竄西南官軍躡追數十里至子牙鎮南擒斬多名賞給湍多巴圖魯名號旣而賊踞河間縣屬之束城村官軍分五路進賊大潰南走追敗之獻縣單家橋交河富莊驛等處賊入阜城縣城並踞附城各村互爲援應僧格林沁分飭諸軍進屯東北自率馬隊繞至阜城迤南攻克高家莊宋家莊各賊巢上嘉其調度有方賞給粵威羅瓦佛一尊白玉翎管一枝白玉搬指一個黃瓣珊瑚豆大荷包一對尋相

度地勢定期分剿飭副都統達洪阿由堆村一帶攻其西南侍郎瑞麟等由連村一帶攻其東北將軍善祿等進軍杜家場迤南僧格林沁親將中軍往來策應遂平堆村連村杜家場賊壘礮船逆首僞丞相吉汝沅餘賊匿不出誘敗之塔爾頭紅葉屯賊向東南竄遂踞連鎮連鎮爲河間府東光縣鉅鎮東西兩岸村落相錯賊並踞之圍攻累月賊恃衆堅守會綿雨河水漲發軍事日棘奏言自六月以來陰雨浹旬河水日漲逆匪蟻聚高阜我軍地處低窪該逆死守不出欲趁水勢另生詭謀極力籌維擬空濠築隄以水爲兵設法浸灌尋隄工竣賊數出奔撲擊走之九月東西連鎮各出數千匪向南圖竄官軍扼之賊大挫自是至十一月賊勢窮蹙收復附近各村遂克西連鎮其東連鎮賊仍負嵎十二月飭投降各勇分紮西連鎮及附近之陳莊極力攻剿並偵知逆首林鳳祥業已薙髮圖遁遂刻日大舉進攻飭都統西凌阿瑞麟等督帶馬步隊攻其北侍郎宗室慶祺等攻其南杭州將軍瑞昌等在河西扼截立將賊柵焚毀於是東連鎮亦復生獲林鳳祥及僞檢點僞將軍等賊黨聚殲捷聞諭曰僧格林沁督兵剿賊疊著勳勞此次攻克連鎮生擒逆首深堪嘉尙著加恩封爲博多勒噶臺親王伊子乾清門三等侍衛伯

彥訥謨祜著在御前大臣上行走見在畿輔地方一律肅清著僧格林沁移得勝之師前往高唐州督辦軍務先是連鎮踞匪分股南竄踞山東高唐州城欽差大臣勝保督師屢攻不下至是逮問來京諭軍營領兵大員均歸僧格林沁節制五年正月抵高唐以州城堅固欲出奇兵勝之遂飭南面防軍故作疏防狀賊果疑夜潛師出全股南遁遂復高唐賊趨茌平踞縣屬之馮官屯官軍追至先奪其西面二村餘黨嘯聚東南隅恃糧足開空地道圖撲破臺以嚴備不得逞相持久之乃密決運河之水倒灌賊巢土墟之中泥深沒踝官軍逼近土埝燒燬賊窟數處生擒逆首李開芳並曾授僞職之黃懿端等八名餘匪無一漏網遂復馮官屯奏入諭曰僧格林沁督師剿賊均合機宜忠勇之誠深堪嘉尙前賞給親王著加恩世襲罔替並賞坐肩輿伊兄三品頂帶台吉郎布林沁賞作輔國公伊弟台吉崇格林沁賞給二品頂帶並賞戴花翎僧格林沁著卽挑選精銳官兵分起南下並卽馳驛來京陞見以慰塵懷五月抵京舉行凱撤禮恭繳參贊大臣關防並訥庫尼素光刀八月充崇文門監督九月奏請酌添外滿洲火器營官兵操演陣勢允之十二月調鑲藍旗滿洲都統六年二月丁本生母憂奏請回旗守制賞假百日

在京穿孝給銀七百兩治喪十二月命充管理溝渠河道並八旗值年大臣尋調補正黃旗領侍衛內大臣七年署鑲紅旗漢軍都統八年四月英吉利兵船駛至天津海口授爲欽差大臣督辦軍務六月直隸總督譚廷襄海防礮臺失陷英船駛入內河僧格林沁奏參命解譚廷襄任七月辦理大沽雙港礮臺並續捐礮位嚴行設防數月事竣賞御用巡幸袍褂各一件十月回京賜紫禁城坐椅轎九年正月仍赴天津防堵五月英船闖入天津大沽口內毀我防具尋復駛至雞心灘直隸總督恆福派員理諭不聽並先行轟擊礮臺繼以步隊登岸督軍力戰勝之並轟燬英船入內河者十三隻奏入所有辦理海防及接仗各員給獎有差十二月回京上念其功賞黃馬褂十年正月以本年恭逢三旬萬壽恩賞杏黃色端罩貂褂仍赴天津辦防自二月至五月兩江總督何柱清等奏言英船有北駛之說命豫爲布置嚴密設防六月英船百數十艘駛至天津海口猝於北塘登岸占踞村莊時恆福專辦撫局而英人要挾無定議並出馬步隊萬餘分撲新河軍糧城官軍退守唐兒沽大沽兩岸勢甚危急僧格林沁先後奏入得旨鎮定軍心安爲調度仍諭恆福辦理撫局尋復諭曰握手言別倏逾半載見在大沽兩岸正

在危急諒汝憂心如焚倍切朕懷惟天下根本不在海口而在京師若稍有挫失必當退守津郡設法迎頭截剿萬不可寄身命於礮臺切要切要若執意不念大局祇了一身之計殊屬有負朕心握管不勝悽愴時唐兒沽又被英人占踞大沽礮臺愈危復奉退守津郡之諭尋奏言回守津郡必至民心動搖見在情形惟有嚴守大沽設法布置竭力固守得旨所奏情形甚有見地仍當仰體朕心勿專以大沽爲重七月英人復占踞大小梁子旋於右岸石縫地方接仗官軍失利礮臺被占擬退守通州於州城迤南擇要駐紮得旨迅速來京面授機宜並得旨僧格林沁辦理海防未能周妥拔去三眼花翎革去正黃旗領侍衛內大臣鑲藍旗滿洲都統八月帶兵留通防守先派員齎摺入奏得旨該大臣威望素著能得民心著仍領欽差大臣關防會同瑞麟辦理防剿並賞還三眼花翎尋以英人逐日前進嚴陣以待獲英人巴夏里等送京英人復整隊來撲官軍退扼八里橋接仗失利得旨僧格林沁革去爵職仍留欽差大臣九月和議成直東及河間一帶土匪蠶起得旨僧格林沁偕侍郎銜瑞麟前往剿辦十月以山東團練大臣杜翻奏捻匪猖獗濟寧兗州泗水均已被圍諭僧格林沁俟畿輔肅清卽赴山東節節剿辦

旋奏言陸續緝獲土匪分別正法各匪以次解散擬卽取道東昌以次南下得旨抵東後必須會合兵勇進剿匪巢以期一鼓蕩平是爲至要尋諭於濟寧兗州一帶擇要駐紮先將北路妥爲布置嗣與賊戰於鉅野之羊山失利僧格林沁以瑞麟節節退守怯懦無能効之上褫瑞麟職十二月鄒縣教匪宋繼朋倡亂僧格林沁督師往剿勝之越日再勝賊於河灘暨后峪地方十一年正月捻匪由東平等處渡河副都統伊興額追至楊柳集遇伏戰歿四月解滕縣圍克沙溝營及臨城驛先後殺賊六七千人時賊竄鄆城勾結長槍會匪圖陷濟寧州屬之金鄉鄒縣教匪亦恃險不下僧格林沁次第進攻疊有捷仗六月曹州會匪分股各踞要隘僧格林沁遣翼長舒通額等分兵進剿敗賊於曹縣安陵集濮州田潭各擒其渠八月賊渡運河自泰安竄濟南僧格林沁親統大軍躡之賊聞風東竄踞孫家鎮官軍進擊賊由靳家橋遁青州九月襲賊於臨朐縣南沿諸城至沂水適黑旗捻首跨河拒敵分隊擊之賊合股回抗追至蘭山之蘭陵鎮殲焉奏入諭曰捻匪自入東境以來雖疊經剿擊總未大受懲創此次僧格林沁親督大軍殲除殆盡洵足以寒賊膽而快人心著加恩賞還御前大臣並賞還黃纏十月授正紅旗漢軍

都統管理奉宸苑事務穆宗毅皇帝御極諭曰僧格林沁受三朝知遇之恩宣力中外功勳卓越見在統兵剿辦教捻各匪紀律嚴明兵民愛戴朕欣慰之餘尤深眷系允宜特沛恩施用彰殊眷著賞還博多勒噶臺親王旋命管火器營事務時大股捻衆由山東高密壽光章邱入濰縣僧格林沁調馬步隊馳繁蘭嶧賊西竄濟寧營總富和等捷於楊莊岡山十一月僧格林沁母病上賞給人瀛命其子伯彥訥謨祜回牧代爲省視先是會匪踞壽張池西僧格林沁令侍郎宗室國瑞等躡蹤追壓先取簸箕營次取竹口圍而曹州會匪復恃濮州紅川口土圍堅固意圖久踞僧格林沁率各軍合剿越濠攻入搜斬無遺陸續毀劉家橋及菏澤郭家唐房老巢正移營間定陶縣佃戶屯老巢賊衆潛撲大營都統西凌阿拒之賊敗南奔救出陷賊良民無算抵大張寺賊來撲復擊走之斃賊千餘尋復范縣十二月捻賊踞鉅野縣境西凌阿往攻大捷其定陶馬家集之賊遂喪膽逸去適會匪郭秉鈞等自河西回犯東岸趨曹郡僧格林沁由荷澤陳家集督師乘其後自崔家壩至黃河南岸屢挫賊鋒曹屬漸就蕩平同治元年正月江蘇豐縣捻匪二萬餘由金鄉犯魚臺勢張甚令翼長蘇克金等進攻力戰斃賊數千餘匪奔豐沛間

二月毫東捻匪糾合各股悍賊並長槍會匪併力西竄僧格林沁督帶馬隊追至河南杞縣賊分股來撲僧格林沁設伏誘之乘賊撤隊時馬步齊出毀賊營七復攻破趙寨等匪賊大敗宵遁是役也三路會剿殺匪萬計奏入上嘉獎之其宵遁之賊向西南窮竄僧格林沁督率各軍由陳留追抵尉氏匪踞縣東擊之屢有擒獲匪懼退入民寨派隊進攻匪列陣數里旋詐退欲由旁路包鈔營總卓明阿等整隊以待至匪迫近奮力衝入匪大震閉寨固守官軍復設法撤去東面重圍誘至樊家樓地方撥馬回剿槍礮齊施毫東逸出之餘匪至是殲焉五月補正黃旗領侍衛內大臣時山東長槍會匪董智信等竄入直隸東明境踞沙果寺民寨蘇克金等馳剿智信乞降呈繳軍器多件其盤踞坦頭集等處捻匪亦經富和攻克並招撫被脅者數十圩寨六月進攻金樓先是敎匪郜姚氏踞金樓並有賊目金鳴亭施其狡謀攻之不克至是僧格林沁督飭各軍剿撫兼施投誠甚夥復激勵將弁率以進攻降勇先擁入賊圩各軍繼之與賊巷戰陣斬郜姚氏及其兩子並賊目常立身等餘賊搜殺淨盡立平賊寨又乘勢敗賊於邢家圩吳家廟營廓集等處均有斬擒事平諭曰金樓敎匪荼毒生靈尤爲頑惡異常僧格林沁督率官

軍一鼓殄除實足大快人心是月長槍會匪焦桂昌等復竄曹屬意在糾合黨與四出滋擾僧格林沁檄恆齡剿之遂擒焦逆並獲首從各匪戮之又先後攻克蘭山之卓山寨洪山寨及太邱雙橋集各賊圩尋疏言各路統兵大臣及督撫大吏奏報含混一味搪塞爲將帥者市恩於麾下爲督撫者見好於屬員每以將佐一戰之功遽行優保請皇上密派賢員數人自臣軍營及各路軍營認真密查又軍務莫急於餉缺而餉缺蓋由於各省徵收之不足其中有水旱偏災賊竄邊境者不肖州縣藉此措詞其實災輕之區良善之民誰未納賦不過州縣意圖肥己私徵匿報道府職司監察耳目切近豈無所聞其中或有喜其逢迎遂代爲緘默地方大吏偶有風聞又念道府情面姑且容之直待斷難姑息始行參革撤任豈知事已不可收拾又豈知被劾之官私橐已飽似此吏治若各省督撫司道再不設法挽回嚴定章程實行懲勸軍餉何由得充官方何時能肅奏入諭曰督兵大員肯將軍營積弊據實上陳具見公忠體國不染習氣甚屬可嘉七月命統轄山東河南全省軍務並調度直隸山西省防兵直隸山東河南山西省督撫提鎮以下各官及正白旗漢軍副都統遮克敦布右侍郎毛昶熙署漕運總督吳棠均歸

節制其蒙毫徐宿等處防兵並一併調遣八月大股捻賊竄山東魚臺之羅家屯  
僧格林沁親督各軍由河南夏邑馳至自金山迤東分駐進攻國瑞從中路直衝  
賊陣賊腹背受創殺賊千餘追過山梁又殺賊四五千人九月進克張大莊盧廟  
孫老莊邢大莊各賊圩擒斬捻首李廷彥孫彩蘭等王新莊等各寨均降毫東捻  
首宋喜元等亦殺賊歸正亳州以北一律肅清十二月諭曰僧格林沁督兵剿賊  
懋著功勳兩載以來由直隸山東以至河南安徽境內櫛風沐雨辛苦備嘗見進  
攻亳州各捻匪巢穴時當冬令布屋單寒殊深廬念著發去黃面貂尾馬褂一件  
交僧格林沁祇領以示體恤二年正月捻首孫醜等掠河南鹿邑僧格林沁派副  
都統舒通額等擊之殲步賊萬餘二月連克安徽潁州屬之雉河集尹家溝賊巢  
陣擒捻首韓四萬等尋偵知巨捻逃匿李莊遂派舒通額等會集鄉團圍攻之賊  
懼執其渠以獻匪首楊瑞瑛王懷義等先後請降僧格林沁令翼長全順潛駐王  
懷義原寨藉探賊蹤適捻首蘇添才等誤投入寨經全順按名弋獲匪大懼捻首  
李勤邦等誘擒巨捻張落刑並其子張滄以獻餘匪悉平事聞諭曰安徽蒙亳等  
處自遭捻患幾及十年僧格林沁銳意剿除卒能將各股捻首擒獲收撫使積年

巨患剋日埽除洵屬調度有方謀勇兼備科爾沁親王僧格林沁著加恩仍以親王世襲罔替前奉特旨賞用章服等項並仍准其服用以示優異六月剿平山東淄川踞匪並將逃匿大白山之賊悉數擒獲上嘉之尋諭曰近日天氣炎蒸該大臣冒暑督師運籌決勝允宜優加賞賚以獎勳勞著發去黃瓣珊瑚豆大荷包一對黃瓣珊瑚豆小荷包兩個翠翎管一枝白玉搬指一個白玉煙壺一個玉柄小刀一把火鏢一把俟伯彥訥謨祜由隆福寺差竣回京卽令親齋前往軍營交僧格林沁祇領並傳諭該大臣爲國賢勞允宜善自保愛以隆委寄初教匪宋繼朋之負嵎鄧縣白蓮池也糾黨二萬餘四出劫掠當派總兵陳國瑞紮營白蓮池山腰攻其老巢賊乘高下撲陳國瑞揮軍大進擒賊首劉錦春副將郭寶昌伏兵譟而起立破之敗匪竄紅山爲死守計尋糧盡欲遁國瑞扼其東面而設伏山西山之嶺下嚴陣待之陳國瑞督帶本隊由雲蒙寺先搶山梁撲入賊寨將東山西山之匪衝作兩截其西山之匪撲竄下山復經陳國瑞迎擊據其寨隨將東山之匪圍殺殆盡計凡閱月鄧縣股匪悉平奏入諭曰僧格林沁自攻克淄川後移軍鄧縣甫經匝月卽將教匪埽穴擒渠良由調度有方用能驅策羣力深堪嘉尙尋以山

東地方被賊滋擾地方荒廢寢多奏請移民認墾允之十月捻首苗沛霖糾衆數萬擾及安徽蒙城僧格林沁親督馬步隊馳赴亳州先克蔣集擒匪首陳萬福斬之尋破楊家寨與陳國瑞等軍會合攻其南面絕賊糧道並破蔡家圩賊營二十四座復親督大軍分路並進其河南賊壘三河北賊壘五悉數剿除苗逆計窮昏夜越濠出竄總兵王萬清斬首以獻逆黨苗景開等均伏法蒙城圍解時西洋集踞賊猶負固抗命僧格林沁調隊合攻由西南兩面攻入擒斬賊首葛春元等斃賊三千餘名其葛家圩魏羣兒等寨悉投誠淮甸漸就肅清遂飭總兵恆齡等分往潁亳及壽州一帶清理圩寨緝拏匪犯收復城關其不遵勸諭者併誅之先後奏入得旨嘉獎三年四月疏言用兵之道首貴嚴明偵探知彼知己調度戰守方能合宜近見各路軍營奏章每以賊衆兵單爲詞獲捷之報絡繹不絕而賊勢愈衆蔓延愈廣總由領隊之員不能確探賊情賊至不肯迎頭堵擊賊去又不肯跟蹤追剿但敷衍出境卽報勝仗以少報多諱敗爲勝豫爲冒功邀賞地步握兵符者既不能身臨前敵復不詳加查考率行據稟入告相沿成習急須認真整頓上諭之並命督師皖豫楚三省之交如有似此情弊一經見聞卽指名奏參五月諭

曰本年髮捻各匪竄擾楚豫交界該大臣親督所部兵勇轉戰而前所向克捷近  
日天氣炎蒸該大臣冒暑督兵不辭勞瘁著發去黃紗馬褂一件金表一對玉柄  
小刀一把火鏟一把鼻煙一匣茶葉二匣派伯彥訥謨祜馳驛親齎前往軍營交  
僧格林沁祇領並傳諭該大臣爲國宣勞尤宜善自愛護以隆倚畀六月江寧克  
復諭曰僧格林沁在直隸山東等省肅清全境並督師皖北將張落刑苗沛霖等  
股剿滅近復移紮豫皖之交扼剿東竄援賊該親王忠勇性成不避艱險軍麾所  
涖威望允孚已疊次加恩晉封親王世襲罔替著再施恩加賞一貝勒令其子伯  
彥訥謨祜受封七月復諭曰該大臣向於蒙古官兵內保舉出力將士從不肯稍  
有冒濫見當江寧克復所有僧格林沁軍營統帶蒙古馬隊各員著擇其出力者  
酌量保奏候朕施恩其該營蒙古兵丁著加恩賞銀一萬兩以示體恤時髮捻各  
匪竄踞湖北之麻城於縣城南之閔家集築壘二十餘座僧格林沁派成保帶兵  
進剿均克之郭寶昌一軍並克蔡家畈等處老巢賊竄河南羅山汎南之楊家店  
僧格林沁親督馬隊乘勝逐北抵蕭家河殺賊無算其竄至上巴河蘄州之賊復  
勾合東竄各匪屯踞風火山蔓延數十里旣陣官軍薄之賊翻山奔蘄水逾芭茅

街賊屍盈路進至土漠河見沿河叢林中賊壘森布僧格林沁分軍扼駐賊首陳大喜等各率伏裏鈔直撲官軍復有他賊鈔在官軍之前陳國瑞直擣中堅匪衆四潰越日達黑石渡檄令降日黃中庸乘夜襲取賊營僧格林沁復親督馬隊衝壓賊震懾逆首溫其玉黃文誥等率衆棄械乞降並擒獻僞端王藍成青降其衆數十萬人誅藍逆四年正月河南寶豐縣積匪踞甘露臺張八橋等處僧格林沁駐軍寶豐四路兜剿飭郭寶昌等偏賊安營賊擁衆出擊卻之復派成保督帶馬隊橫截使賊首尾不能相顧賊兵亂適有別股賊匪蠭擁而至圖犯總兵何建鼇扼駐塔爾灣之軍官軍佯退賊尾襲兩旁伏起應之將步賊全數殄除馬賊竄向梁窪棄壘而走及清涼寺殺賊千餘另股髮捻賴文洸等因各軍堵截糾衆折向南竄圖陷魯山僧格林沁督飭恆齡等軍越山追剿抵魯山城下賊突出馬隊撲城既復拚死回鬪餘賊潛襲後路官軍合圍賊遂竄葉縣僧格林沁令勇目從間道引軍設伏連破賊壘二月賊由臨潁復回竄河南信陽郭寶昌等軍併力截剿賊遁確山復親督各軍星夜疾馳並分接應之軍防賊後路賊果來撲陳國瑞督勇力戰步賊先潰官軍馬隊從山口突出賊馬隊亦潰賊衆遂不成軍四月髮捻

入山東由汶上縣之袁家口犯及鄆城西北水套一帶勾結伏莽馬步數萬僧格林沁督師猛進日連一二百里再戰再勝之追至曹州府西北高莊集地方時官軍重躡羸餓遇賊鏖戰竟日力不能支遂潰僧格林沁撫循殘卒退入荒莊既夜賊掘長濠困之全順等請衝圍出越濠賊層層包裹陳國瑞馬隊四千覆幾盡餘軍與賊不相辨識長驅並驚於昏黑之中行至吳家店從騎半沒僧格林沁手刃悍賊馬蹶遂遇害內閣學士全順總兵何建鼇與焉幫辦軍務杭州將軍宗室國瑞奏入諭曰欽差大臣科爾沁博多勒噶臺親王僧格林沁於咸豐三年間督師剿賊疊克臨清連鎮馮官屯高唐州等處北路賴以肅清嗣於十年間整旅南征轉戰直隸山東河南安徽湖北等省埽蕩擒圩殄除髮匪擒斬巨逆張落刑苗沛霖等不可勝計軍麾所至衆望允孚朝廷以該親王頻年轉戰士卒疲勞申諭再三令其持重而該親王忠勇性成視國事如家事臨陣無不身冒鋒鏑誓滅此賊而後已方期天鑒忠忱克竟全功長承恩眷乃因猝遇賊伏力戰陣亡覽其死事情形不禁爲之隕涕著賞給陀羅經被照陣亡例以親王飾終典禮從優議卹應得卹典該衙門詳察具奏任內一切處分悉予開復准其入城治喪其靈柩回旗